



**Meeqqanut suli atualingitsunut perorsaankkut inerikkiartuutaasunik ulluunerani neqeroorutit pillugit Inatsisartut inatsisissaanni §9 imm. 1 allanngorteqqullugu Naalackersuisut peqquneqarnissaannik Inatsisartut aalajangiiffigisassaattut siunnersuut. Taamaalilluni meeqqat illugiimmik angajoqqaallit, tamarmik sulisimappata imaluunniit ilinniartuuppata, kommunep ulluunerani paaqqinniffiinu ulluuneranilu paarsisarfinnut utaqqisut allattorsimaffianni meeqqanut kisimiittunik angajoqqaalinnut sulisimappata imaluunniit ilinniartuuppata assigiimmik pineqarnissaat angujumallugu.**

(Inatsisartunut ilaasortaq Laura T. Uitsatikitseq, Siumut)

(Siullermeerneqarnera)

**Meeqqanut suli atualingitsunut perorsaankkut inerikkiartuutaasunik ulluunerani neqeroorutit pillugit Inatsisartut inatsisissaat allanngorteqqullugu Naalackersuisut peqquneqarnissaannik Inatsisartut aalajangiiffigisassaattut siunnersuut. Inatsisip allanngortinneratigut qulakkeerneqassaaq, kalaallit nunani allani ilinniartut qitornaasa kommunip meeqqeriviutaanut ulluuneraniluunniit angerlarsimaffinni paaqqinnittarfinnut utaqqisunut allanut naleqqiullugu sallinngortinneqartalernissaat ilinniartup Kalaallit Nunaanni sullivimmi imaluunniit oqartussaaffiit arlaanni sulilernissaminut isumaqatigiissuteqarluni takutissinnaappagu.**

(Inatsisartunut ilaasortaq Malene Vahl Rasmussen, Demokraatit)

(Siullermeerneqarnera)

Naalackersuisut siunnersuutinu ukununga akissuteqarneranut, aammalu malittarisassanik 1978-imeersunik nutartertariaqavissunillu matumuuna sammisaqaratta paasisimammassuk qujaffigerusuppagut. Naalackersuisut arlalinnik soqutiginantunik misissortariaqartunillu apeqquteqarput. Naalackersuisut tulleriarisarnermik aalajangersakkat taaneqartut nalilersorneqarnissaanut, kingornalu Inatsisartunut nassuiaammik suliaqarnissaq allannguutissatut siunnersuummi siunnersuutigaat.

Nassuiaat qaangiinnarlugu toqqaannaq iliusseqarnissamut ingerlanissaq Demokraatit piumaneruaat. Nassuiaammik asuli kinguarsaataaginnassaaq. Naammaginangilluinnarpormi, sualummik ilaqutariit meerartallit utaqqisunut allatsinnermi aporfissaqartarmata, soorlu ernereerluni sulinngiffeqarnerup kingorna, imaluunniit illoqarfigisamiik illoqarfimmut allamut nuunnermi. Tamanna kingunerikkajuttarpaa angajoqqaat meeraq ilagalugu angerlarsimaannartariaqarnerat, taamaalillutillu aningaasarsiorsinnaanertik annaallugu. Tamanna aamma inuiaqatigiit aningaasarsiorneranut nioqqutissiornikkut, akileraarutinillu isertitassaagaluartunik annaasaqartitsisusarpoq.

Demokraatit nunani allani ilinniartuutitsinnut angerlaqqinnissamut kajumissaarinnissaq uani pingaarnertut isigaat. Angajoqqaanngorsimanermi sulinngiffeqartarnerup inatsisaa matumuuna



allanngorsaleruttorparput, uagullu isumarput tassaajuarpoq angajoqqaat meeqqaminik nammineq paarsisinaaneranik sivitsuineq, angajoqqaat pisinnaatitaaffiit periarfissaanullu pitsanngorsaanerussasoq. Tamassuma aamma kalaallit, nunani allani najungaqtut angerlaqqinnissaannut qiimmassaataaqataasinnaavoq. Kalaallit ilinniarluarsimasut nunanilu allani najugallit piginnaasai nunatsinni pisariaqartippagut.

Meeqquerivinnut inissaaleqineq illoqarfinni anginerni nalunngisatsit ajornartorsiutaavoq, paasiuminaapporlu sooq ilinniartut kalaallit, uani meerartallit pineqarput, illoqarfittaassamut nuunnginnermi utaqqisunut allatsinnissamut inatsisitigut periarfissinneqarsinnaannginnersut. Nammineerlunga taamatut ajornartorsiuteqarnikuuvunga, taammaattorli uanga iluatsitsisimavunga tassami meeqqama meeqquerivinnut inissaqalernissaata tungaanut qaammat ataasiinnaq piumasarinngisannik feriarnera atorsimagakku. Ajoraluartumilli allanik nalunngisaqarpunga illoqarfimmut allamut nuunnermi, illoqarfittaassamut nuunnginnermini meeqqaminik meeqquerivinnut allatsisimasinnaannginnertik peqqutigalugu sulileqqinnissaminnut ajornartorsiorsimasut. Sunut tamanut aporfiuvoq, iliuuseqarfigisariaqarparpullu.

Aallartilluassaagut siunnersuutit uku pitsassuit marluk akuerigutsigit, taamatullu oqaaseqarfigalugit ataatsimiititaliamut susassaqtumut sammineqarnissaanut innersuuppagut.